

# #MASDESAROYO

*Resúmen di siman*  
**25 Novèmber - 8 Desember 2019**



MINISTERIO DI  
**TRÁFIKO, TRANSPORTE I PLANIFIKASHON URBANO**

# #MASDESAROYO

*Resúmen di siman*  
*25 Novèmber - 8 Desember 2019*

Kòrsou ta un isla rondoná ku laman kristalino.

Pa un hende bini òf bai for di Kòrsou e mester uza sea un avion òf barku. Pa e motibu aki, den mi ròl komo Minister di Tráfiko, Transporte i Planifikashon Urbano, mi ta hasi tur posibel pa sòru pa nos pais ta aun mas konektá ku mundu na un manera seif.

Outoridat di Aviashon Sivil di Kòrsou ta e outoridat kompetente ku tin ku kontrolá si aereoliñanan ta kumpli ku tur rekisito pa asina garantisá seguridat di kada pasahero na momentu di biaha ku avion.

Últimamente por nota ku mas i mas aereoliña ta kuminsá bula destinashon Kòrsou. Aparte di Wingo, Caribbbean Airlines, Air Century. Nos tabatin resientemente, buelo inaugural di Aruba Airlines i tambe United Airlines.

*Zita Jesus-Leito*



## BUELO INOUGURAL DI ARUBA AIRLINES I UNITED AIRLINES



Aruba Airlines ta sali di Aruba, pasa Kòrsou, ku destinashon final Miami. Frekuensia di e buelonan ta 4 bes pa siman (djaluna, djarason, djabièrnè i djadumingu). Aruba Airlines ta uza e tipo diavion Airbus 320 ku ta karga un total di 180 pasahero.



United Airlines na su turno ta bula di New Ark pa Kòrsou. Buelonan ta 1 bes pa siman, riba djasabra. United Airlines ta bula ku Boeing 737, kual ta karga un máksimo di 126 pasahero.

## SELEBRASHON 100 AÑA AVIANCA



## DIA INTERNASHONAL DI AVIASHON SIVIL 2019

Atraves di aviashon, nos por bishita famia, bai ku fakansi afó i konosé paisnan nobo, pero tambe biaha pa sera lasonan empresarial. Ta importante pa esaki sosodé na un manera seif i sigur. 7 di desèmber 2019 ta Dia Internashonal di Aviashon Sivil. E aña aki mundu ta para ketu na selebrashon di 75 aña ku a firma e asina yamá ‘Konvenio di Chicago’. Aviashon ta un di maneranan prinsipal ku paisnan ta konektá ku otro!

Den kuadro esaki, personal di Outoridat di Aviashon Sivil di Kòrsou tambe a para ketu na e fecha speshal aki. Dia 5 di desèmber e personal a partisipá den training hopi fruktífero. Tambe, komo parti di e selebrashon, e eksperto den aviashon Sr. Ruben Inion a tene un lektura interesante tokante Safety & Quality Management Software IQSMS. Esaki a tuma lugá riba djabièrnè 6 di desèmber i diferente ‘stakeholders’ den e mundu di aviashon tabata presente.

A sera e selebrashon ku un selebrashon huntu ku e Minister di Tráfiko, Transporte i Planifikashon Urbano, Sra. Zita Jesus-Leito, CEO’s di DCANSP, Curaçao Airport Partners i Curaçao Airport Holding N.V., i representantenan di e diferente kompania di aviashon lokal.



## CPOST A HASI ENTREGA DI KUENTA ANUAL 2019

CPOST INTERNATIONAL a hasi entrega di nan relato anual 2018 na Minister Jesus-Leito. Den 2018 e organisashon a enfrentá diferente reto, i tabata tin varios logro importante, manera entre otro modernisashon di e servisio di PuntoMio.

E mundu di Pòst ta kambiando mundialmente i komo Kòrsou nos tambe tin ku keda 'up to date'. C POST a demonstrá di por manehá e kambionan aki i move ku tempu. Tambe, e entrega di su relato anual ta un paso importante den kumpli ku bon gobernashon di instansianan di Gobièrnu.

Minister Jesus-Leito lo tuma bon nota di e relato i ta anticipá mas desaroyo positivo riba e tereno di pòst.



## STUDIANTENAN DI UOC A ORGANISÁ 'WILLEMSMART SUMMIT'

Resientemente, studiantenan di 'International Business study' a aserka Minister Jesus-Leito pa e hiba palabra na e konferensia 'WillemSMART'. Nan a organisá e konferensha aki pa asina rekoudá fondo pa nan biahe di estudio. Tema prinsipal di e konferensha aki tabata 'Kon pa nos hasi nos sentro di siudat, Willemtad, un siudat SMART'.

Diferente orador a trese ideanan inovativo dilanti, ku ta toka nos tur su bida diariamente. Minister a amplia riba e tópiko 'Smart Living'. Primeramente, Minister a duna un splikashon di Gobièrnu di Kòrsou su vishon pa kombertí nos pais den un SMART Nation. Seguidamente Minister a trese e benefisionan di 'Smart Living' dilanti.

'Smart Living' ta kontené solushonnan original i inovativo ku ta destiná pa hasi hende su bida mas efisiente, mas kontrolabel, ekonómiko, produktivo, integrá i optenibel. E tin entre otro efekto riba nos bida na kas, na trabou, i e forma ku nos ta transportá di punto A pa B.



## TRATAMENTU DI PRESUPUESTO 2020

Riba 3, 5 i 6 di desèmber a toka turno na mi ministerio pa trata un di e leinan importante di nos pais, kual ta presupuesto 2020. Durante e reunion aki, nos trata e aspekto finansiero di e plannan ku nos tin pa 2020.



## SENTRO MULTI-FUNSHONAL JUAN DOMINGO TA BIN DEN 2020



Desaroyonan den área di Juan Domingo a pone ku hóbennan di e barío no tabatin espasio adekuá pa asina topa otro i ehersé deporte. Pa remediá esaki, Gobièrnu di Kòrsou a tuma e desishon pa desaroyá un Sentro Multi-funshonal kaminda e barío por topa i práktika deporte.

Resientemente a reuní ku representantenan di barío pa asina informá ku Gobièrnu a reserva e fondonan nesesario pa realisá e promé fase di e proyekto aki na komienso di aña 2020.

## FONDONAN DI UNION EUROPEO PA HALSA KALIDAT DI BIDA DEN NOS BARIONAN.

Gobièrnu di Kòrsou tin un bon koperashon ku Union Europeo ya pa hopi desenia. E relashon aki ta un estímulo pa desaroyo ekonómiko i sosial di nos pais. Kada 4 aña Union Eutopeo, ta pone fondonan disponibel gratuito. Pa e periodo di 2020 te ku 2024, Gobièrnu di Kòrsou den koperashon ku Union Europeo, a base di e di 11 fondo europeo lo invertí mas o ménos 16.95 mion euro. Pa e temporada benidero lo enfoká riba e tema: Konstrukshon di un komunitat resistente, i lo tene kuenta ku uzo di energia alternativo. Planifikashon pa e proyektonan aki ta den full swing.



## E DI TRES FORO MARÍTIMO A TUMA LUGÁ; MARE FORUM 2019!

Pa di tres aña konsekutibo, Curacao Ports Authority (CPA), a organisá e konferensha ku nos por konsiderá komo e foro mas influyente pa e sektor marítimo. Durante di e konferensha, aki mi a splika i responsabilidat pa ku kumplimentu ku normanan di seguridat marítimo, inkluyendo e sektor di krusero.

Tabatin diferente oradornan lokal i internashonal ku a trata un variedat di tema, manera tendensianan global pa loke ta trata turismo krusero, polushon di barkunan, transishon di energia, marka i registro di barkunan. Despues di e presentashonnan aki, tabatin un momentu pa partisipantenan interkambiá di idea i duna nan opinion

## SESHON DI INFORMASHON I GROUND BREAKING NA SOUAX


Dia 3 di desèmber Minister Jesus-Leito hunto ku Servisio pa Obra Públiko (OW), den kompania di habitantenan di barío a duna inisio na proyekto di mantenshon di kaminda den Souax. Habitantenan tabata hopi kontentu ku porfin nan barío ta haña atenshon debido. OW ta bai drecha tur kaminda no-asfaltá den Souax pa asina e kareteranan ta seif i den bon estado.

Trabounan di preparashon ta kuminsá den desèmber di 2019 i ta kontinuá den 2020. e proyekto ta parti den 3 parti, esta mantenshon di Souax Ost, Souax Sùitwèst i Souax Zùitost. Trabounan ta terminá den mart di 2020 i Minister Jesus-Leito i OW ta pidi un i tur pa pasenshi durante ehkushon di e proyektonan.



## UPDATE DI PROYEKTONAN DI MANTENSHON KAMINDA

Minister Jesus-Leito hunto ku Servisio pa Obra Públiko (OW) a ranka Sali ku proyektonan di mantenshon di kaminda. Den korto tempu pa ehikutá fase 1 di mantenshon di Esmeraldaweg, tambe a fris diferente kaminda, i a pone krusada elevá den Kaya Seru Milon. Pues trabounan ta progresá rápidamente.



Den Souax i na Knep a kuminsá ku preparashon pa kontinuá den 2020. Di e forma aki, poko poko pero sigur ta drecha tur kaya na Kòrsou. Asin'aki ta alsa seguridat den tráfiiko, ku ta e meta prinsipal!



Ministerie VVRP



+599 9 511-8582



@ministerievvrp



Minister Zita Jesus-Leito

Ministerio di Trafiko, Transporte i Planifikashon Urbano

KEDA KONEKTA KU MINISTERIO DI VVRP